

mainatges d'òc **PLUMALHON**

Los samis



Lo Tió



**Bon Nadal
e bona annada**

Pescaires de sol

Lo pelican gris

Los pelicans grises vivon en Africa tropicala. An un bec long amb una pòcha dejós e de patas palmadas cortas.

Los pelicans son fòrt plan adaptats a la vida aquatica.

Los fossils vièlhs de 30 milions d'annadas son la pròva qu'an pas gaire evoluat dempuèi aquela epòca.

Un poleton tot nus

Pendent la sason de la reproduccion, los adultes s'agropan en colonias e fan de nises rudimentaris amb de bròcas. Las femèlas i pondon un o dos uòus.

Quand nais, lo poleton es completament nud. Cal un desenat de jorn per que se vestisca de borrihls blancs.



Lo paire e la maire apasturan los pichons. Los vièlhs parton matin per pescar de peisses qu'engolan per los predigerir. Lo poleton marga lo bec dins lo gargalhòl del vièlh per i prene los peisses qu'aqueste torna far montar.



Nadar, volar, cabussar...

Los pelicans grises vòlan fòrt plan. Per pescar, se meton en mièg-cèrcle e butan los peisses cap a las aigas prigondas.

Lor cosin d'America cabussa per atrapar sas predas.

Dins los pòrts de pesca, se tròba de pelicans a l'espèra dels batèls de pesca. I se noirisson de totas las curalhas que fan los pescaires.



Los pichons començan de nadar al cap de dos meses e a tres meses, vòlen en companha dels vièlhs.



Amb una longor de 1,35 m e un pes que pòt arribar a 12 kg, lo pelican gris es un aucèl gròs.

